



تجليات
أدبية 2

راكبة الحواديت

أحمد عواد

شعر

89

راكية الحواديت

شعر

أحمد عواد

وزارة الثقافة



وزارة الثقافة



الهيئة العامة لقصور الثقافة تجليات أدبية

رئيس مجلس الإدارة
سعد عبد الرحمن
أمين عام النشر
محمد أبوالمجد
الإشراف العام
صابحي موسى
الإشراف الفني
د. خالد سرور

المتابعة والتنفيذ
فارس الحبالي

• حقوق النشر والطباعة محفوظة للهيئة العامة لقصور الثقافة.
• يحظر إعادة النشر أو النسخ أو الاقتباس بأية صورة إلا بإذن
كتابي من الهيئة العامة لقصور الثقافة، أو بالإشارة إلى المصدر.

• راقية الحواديت
• أحمد عواد

الهيئة العامة لقصور الثقافة

القاهرة 2013م

135 x 195 سم

• تصميم الغلاف، أحمد شوقي

• المراجعة اللغوية، شعبان ناجي

• رقم الإيداع، ٧٠٨٨ / ٢٠١٢

• الترخيم الدولي، 978-977-718-298-0

• المراسلات:

باسم / إدارة النشر

على العنوان التالي، ١٦ شارع أمين

سامي - قصر السعيدني

القاهرة - رقم بريد ١١٥٦١

ت: 27947891 (داخلي، ١٨٠)

• الطباعة والتنقيط:

شركة الأمل للطباعة والنشر

ت: 23904096

راكية الحواديث

إهداء

إلى أبي وأمي
لقاء أشتد به رغم ما غلف الروح

إلى زوجتي
حنين لا ينتهي ولن ينضب
إلى ممي وإلحام أحمد عواد
أوردة مرصعة بالحياة

إلى إخوتي
المسافات يقطعها الكنين

إلى أصدقائي
نوافير قلبي
ومي زهرة
وحلبي

الورقة الأولى

حد مرهون بالضراق

بنفسجات الصبر

بنية الخوف الى ساكن فيك

ببتبناك

وتزغزغ الملكوت

وتزق فيك ارتعاشة ...

وشوشات متلقحه

على قعر الوشوش

وبنفسجات صبر السكك

وانت كما السنط

واقف تفاردك ريح

وكسيح يا نن عنيا لما تبوح

الجرح واقف فوق جبينك

صقر رافض الاصطياد

متلخبطه شمس الحقيقه
بشمس أوها مك
وملطخه ضلك
على كعوب البنات
نص ارتعاشه وسمي وادخل
ريها تلمحك
مرجيحه نايمه
فوق حدود دهشتك
نص لصليب اندفن مكسوف
البتت فردت كل شئ
ولسه ف إديها
حاجات
بترأود الملفوف ف ضلك

لحظات الوداع
وانت اللي مولود من ضباب العجين
بيشردوا حزنك
مع العفارييت
أسفلت مخك سف أوجاعك
مدمن حروف انفجار
كونك على الملكوت
صفصاف عيونك نصبك
خيالات
أدخل كما نوم القزاز
ع البنت
ف الضلمة ما تسميش
والفجر لما يعدي لعيونها

تفرق الدبايس
وتحل ضفירתها
تشعلق نصها بنص مش فاير
وتحط تحت الإيدى والرعه
خط عبيط
متشعبطه الأيام
على حروفك
وخوفك
ارتعاشك
وانت كما توت بلدنا بيحتفي بالقز
متغطي عرى
تجز شوقك جز
البنيت لساها بتقرا فى الإخلاص

وانت المدين لارتعاش الفجر بهروبه
بتقول يا دوب
الحلم ما يغطي
فتطيش سماك
بين الجليد والحدود
فغروق سماك
بنت لسه بكر
مفطومه ع المراجيح
وهبوب رياح الصهيل
فوقت مش معلوم
نصك ف إيدي
ونصك الثاني
بيمضغ سحنتك

طب قولي إمتى تكتمل ..
وتطير !؟
إن كان عبير الشمس
بيننا غش ضباب الممكنات
وانتا ما بين السما والأرض
متمدد
والبنت فعروق السما
مقطومه ع التباريح

أبريل_2000

حبات التلج

وكأن الشمس مرايه
بتعكس لونك
وكأن الشمس ملايه تلفك
وتخشك
فتقيد القمر التايه جواكي
تايه جوايه
ما بينا
وترسم ضلك
كونك .. أحلامك
وتسيب القطر التونو
فوق دخان الشيشه
وطعم الشاي

وحده يسافر
جوايه
اتمرد حلمي ال كان
بيدور على لحظة يخشك
ويولع كوم الثلج المتكور
تسقط حبات الحب الفرط

.....

دوبتك مرّه ف مطرة بريئه
وزرعتك على ياقة قلبي
اللي ييفتحني ساعات
جاوييني
على قد البوح المدبوح ف سكاتك
باعشق أناتك

ويدوب فى المطرة معاكي
وأمنت يان الحب الفرط
ما يروي
ولا يزرع
غير حفنة أشواق
وأنين.

أكتوبر_1997

حلم الرصيف

حبيبتي
نص عذاب
ونص بنوته
وانا قلبي لم الهوى
فتفوته .. فتفوته
وفاتني من غير ملامح
لشوق ما ييكفيش
حواديت سئيلة ع الرصيف
ما بتتطفيش
وانا اللي فارش ضلتي ع الكون
وبكون معاكي كيف مع الدراويش
إن خفتي أطمئن رعشتك

واعدى بيكى
من رصيف لرصيف
بلسم هواكى طبب المجاريح
لكنه سابنى
نار تفارد ريح
عريتى قلبى فوق رصيف الصيف
وسبتى ننى يغازل التباريح
محناش لبعض
يا نص إحساسى
حدوته حلوه اتقسمت بينا
خدتي ابتسامها
وسبتى ليه أحزانها
الحق عندى

وانا الغلطان يا بنت الإيه

لو قلبى لسه بيوجعك

رديه

وسبيه

على نص الرصيف الفاضي

من ضلنا

جايز بلوعة فرقتك

يرتاح

أكتوبر_2001م

ضفيرة من الكسوف والخوف

وقع الكلام

والشمس قامت تستخبي م المطر

طب مين حيحضنتي

ومين يدفيني

طل الدفا

من مستطيل البرد والغربه

اكتب مواويلك على الصفصاف

وان خاف يشاركك أزمته

إرحل

ولفين يا طل الرحله بتودي

ولمين حنرمي حنيننا المكسوف

الخوف عنيد

دایما یسابق بسمتی
بینی مداین رعشتی
علی طرف شباکک
وان شاف سنین الحلم هاتزهر
بیقطفها
الخوف ساعات
یرسمنی فوق ضیک
ألم
علی ننگ
هروب
علی آخر المسافات
غضب
الخوف وانا وانتی

تواءم
مين يفرقتنا
ومين يقدر يدوس على خط الوجع
انا وانتى
مستطيل ناقص وتر
يجمعنا لهفه ع الفراق
ولهفه ع الهروب
مين اللى يهرب جوه م التانى
ومين يواجه
ضيئنا المكسوف
الخوف
بيوت من قلق
لو تحتويننا نموت

راكية الحواديث

كل الشوارع
ضيقة بدونك
وانا وخيالي
بمختلف الشوق إليكي
ونسبق الأحزان بكا
غرقانة وحده
ورده كانت لحظة شاهد حبنا
وجعان دموع
حلمي اللي كان بيضمننا
ضاقت حدود الكون على حدودك
غمضى صدرك
مفيش غير عنا قيد الفراق

بتقيد ف عينك دمتي
رديلي آخر صبر
ف حيطان اللي فات
هفتان لضلك
بس اتوب منك منين
لو كنتي حلم
حينطفي ف صوت النهار
مبروك عليكى غربتي
وابقى اكتبى اسمى غياب
فى الدرس م الأول
شطلاوى قلبك
يلعب بالحروف سيجه
فعيونك الهربانه فوق كتف السكات

سوق البنات
بيخطى ع الأسرار
وييفتكر مع ضحكه نيّه
فى الحوارى بتتكسف
كل الحاجات
وانا لسه متديل الشتا
فى إيديا متعلق
مع ليل بيسرح فى العيون سهران
غرقان فى قعدة مصطبة يفضفض
سبت شطارة واندلق منه
شفطة بنفسج ويا حزمة شوق
لسه الحكاوى مفتحة عنيا
لبراح يساوى حفتين عقاريت

راكية هموم
واتمخطرت فوق الجفون
اتوضا بيكى
واتحذف فوق الفضا
بين ريح خريفك وطيفك
زفى أحزانى
وان مرة خطت شفايفك
حرف من اسمى
حنيه بطيبة حلمنا
يرجع لبرج عيونك النائم
ليموت غريب
فوق قش أسرارك
اندفن فى عباية الآه
وانطلق حواديت

مارس_2002

سَنَابِلُ الذِّكْرِيَّاتِ

الشمس قامت علقت خوفها
نصبت مراجيحها
على وش المطر
واعلنت حلمها
وانتى كما ذكريات سنبله
بتعافر الريح والحصاد
حلمك كما التوته
واقف على الأبواب
أنا حبقى مين اتأكدى منى
خشينى من أول عذاب
واطلعى بفرحى
واوعى سنين خوفك

تبعتر المشاوير
انتى ولحظة فرحتى توأمين
الشمس تعشقهم
تمرّجح حلمهم
تغسل قلوبهم
وانا
موالى بسمته شفايفك
لما تخشنى الحراس

نوفمبر_1998

ملكوت شياطين

ملكوت عيال..

اندلق

بشقاوته فى عيونك

لخبط حروف قلبى

ف حدود كونك

فسرني صهدك

ميت سؤال

بس الجواب بيطيش

أحلم

سنين الحلم ما تكفيش

تسرقتى لحظة قدر

وانتى ما بتخطيش

-معجون شقاوه
قلبك العصفور
ساكن فعجنة حكاوي
قلبي عش النور-
حفنة عيال متعفرته
واتفرطوا فيكي
وانا بين سماكي
لقا

وبين عنيكى
فراق
مسكون وساكن غنا
فوق تل م الأشواق
اتنين بطعم النداء

واقفين انا وضلي
أبدر ضلوعي تد في أحزانك
خوفك يفرطني
حفنة بنفسج
فوق خدود الريح
مراجيح هروب
بتشدني ليكي
تقاردي دمه ..

خطاكي فوق رصيف مجروح
ارتاحي لحظة ميلاد الأرض
من عين القمر
ملكوت شياط
انفجر

بـحـتـرـنـى جـوـاـيـا

-حزمة قدر

بـتـغـمـى عـيـنـي بـشـوـفـك الـبـرـدـان-

مـجـدـوـف سـنـاـيـل

عـشـقـك المـعـصـوم عـطـش

مـحـدـوـف خـجـل

لـعـيـون ..

بـتـولـد قـلـبـى

مـلـكـوت انـفـجـار

يـونـيـه_2002م

فرحة المولد

حبك موالد

وقلبي قنطارين دراويش

سميتي باسمي

فتحلك حلمي

عديتي

سميت باسمك

مسنى ظل أعتابك

واقف على كل باب انتفض بيكي

أشهب مدد

ثم انتفض بالوجد

.....

الحلم مين حيدّه
بين عيني وعيونك
لسه حاجات مؤمله فاكراني ملكوتك
وانا اللي من بين صحابي
اخترت شئ مهنوع
- جوايه جرحك شرود
بين ضفاف الروح-
لسا هاكمّل الطرق
معجونه بحروفك
بينى وبينك حلقة ذكر مفقوده
بينى وبين نفسي حلقة ذكر ما بتخلصش

منتتوره الأحلام ع البدن والروح

لسه سنابل ضينا

شهقة شمس بتفارق

على عيدان القمر

خطوة عنينا اتيامت

بفرحة المولد

وابتدينا فراق

سبتمبر_2003

مواسم الانقلاط

شوقك قدر
حدد ملامح موتك البردان
على حجر الوطن
وانتا اللي كان واقف
على آخر الشوف
يزلزل الملكوت براءة
تغزل الأحلام
ف نهارك البكر
الموارب ضلفته
وف حضن أول شمس
بتقيد المواسم
تعشق الرقصه اللي..
بتجيب الحصاد

.....

إن كنت قادر تعافر شوقك البردان
خطى على
حواديت عنيك المدبوحين وحده
انطفى حلمك
على وشوش الصحاب
متحنى قلبك بخوفك
الممزوج قلق
يفارد الملكوت خضوع
كل اللى كان رهن لإيديك
اتبيست فيه الشموس
لسه عيون البنت قادره تلمحك

تدخلك
تحتل كل المسام
وتفرقك
فتيل دموى الفرقانه ف موتك
ويتوه السر المتعبى ف نن عنيه
يسيل الحلم
ويفوتنى
فتافيت اندهاش

أكتوبر_2003

شلال غنا

غية حمام
ومنتوره ريشها
والبر فاضى من حلم الوصال
وانت اللى فرد
استويت علي شوقك
المحقون غنا
تفتكر
من بين عنيك
حيعدى يوم
ينفجر بين شرايينك حمام
لسه الخيانة بفتح عينها
بتتنصب ملكوت

قوم صحى وردك
والحق الزحمه
قلقان قميصك
من خطا غنوتك
وانت اللى كات البرارى بتعشقتك
وتقول يا وصلك
ترتوى بوجدك
تشابى عليك
قوم صحى وردك
خلى الساعات اللى تقوت من عنيك
تنفجر شلال حمام

أبريل_2004

دهشة

اتبلت الدهشة على وشه الصفيح
الأرض بنية سمك
والبنت ..

لبلاية دايرة تفرق الزغاريد
وبتتسند

على شيخ ييفرد كمه بالتسايح
تسقط على ظهر السما

نهرين رخام وسؤال

الحلم لساه الناموس ييطارده ولا السوس ٩١

تتكور الدهشة تقور

تسرقها ضفايرها الجريد

يا نخل طالل م الوريد مكسوف

شيخنا اللى طالق دقته عصفوره
لساه بيحفظ فى المدى م الخوف
تتشقق الأطفال
والسمسمية تدندن التعاويذ
يتقرط الكون
حبتين ..
حبة ..
تلات حبات .. عيون
ينحنى شيخنا يللم فى الفضا
يتعب
يحوش دهشته للصيف
جميزة تطرح فى البنات
مراجيح

شرنقة

إلى الشاعر المصري جورج حنين

مراجيح عيونك فى الولاد طارحه

كما العاده حرير

يا هلترى

جربت نومك فوق رصيف أفيون

ولا فجيوبك بترحل لجل تتاوب

حبل الغسيل اللي نشف حلمك المعصور

حالف يسافر كل طرحة توت

- صفصاف يا صوت القطر بيفادى الكافور

توتة بلدنا الأرجوان بتفور

عصافير من الطين طرحها

بضفيره لون (ن)

رامية العيون ع السما جنيتين .. أرغول -

يا هلترى

جريت نومك فوق رصيف أفيون

واللا فهدومك

حترحل كل طرحة توت

سبتمبر_1988

حقيقة

حلمك ..
فراشة طين
قلبك عجين
وشك هبوب الريح
فاسمحي إني أسمعك لوني
إرميلي حلمك ع الطبق واقعد
طول عمري واقف أحسبك
على ورقه واقعه ..
م الشجر
وافرطك حشرات
قلقانه ليه الفكره فوق وشك

اضحك
يجوز الضحك حينسيك
ملامح وشك المفتوح على الحاره
صفار وجحور
إرفع إيديك للطين
طواحين بلدكوا الضيقة
بتدور بعكس الاتجاه
فارده فعيونك ابتسامه من يقط العبك
متبقعه باحلامك المرميه فوق كوم القزاز
فمتستحيش من عورتك
تقدر..
خلاص .. اقعد

سبتمبر_1988

جدران

مستغرب ليه

الضحكه ال كانت محدوفه عليك

مش قمره

ولا وشى المغموس ف المدنه زهور

ولا حلمى المحنى تساييح

ارمىلى فانوسك

حاول

كنت بحاول

ألحق عجالات ترمايتى المرحومه حبوب ..

على وشك لكن ؟

ضفايرها المرميه على كتافى كثير ..

بتخونى

يتبعتر وشك

يتلم جراد الشارع
فيشد الخوف المتعلق
فشاويش الدورية اللي بيرمى صباحه رغيغ
يتبعتر .. نستغفر منه
ونلم الضحكات الواقعة عليه
كان الحلم المارد
فاردع الجدران
بيسجل أيامنا المدهونه عرق ،
وبيكتب
رغم القضبان

دخان سيجارتنا الدايله من الدوران

بيعدى ،

ويكتب على وش السجان

ملعون ..

الجوع لو ما يجيش

بكانون التانى وتموز .

سبتمبر 1988

حاول

حاول يغوص من بين ضلوعى القزاز
ففردتنى

حاولت تقرب دايـرته خط النحاس
على صدر بالونه

طيرها بين الدهشه والأطفال
حاولت أغمس دهشته بالريح
قام خبّا وشه المستطيل بالابتسام
ومن على وشه القديم اتسرسبت
الدهشه ..

تكتب فوق وشوش أطفال
خليك - كبار -

بروزها فوق صدره الورق
بنيتين حواديت

.....

نضحك
نفتش جيونا الفاضيه م التساييح
بالطول بعدينا الطريق
ينزلنا
حبل الندى الطالق براءته ف رةشة الصياد
ال كان مدلدل من عينيه اليمام
يملانا شوق
لكن تقرب دايرته خط التماس
على صدر بالونه
منفوخه لكن ..
شكها دبوس

حد مرهون بالفراق

تتهجاني عنيك

وانا لسه بحاول أقطف صهدك

أتسكع بين لمسة إيدى

ورعشة عينك

ساعة بوح

ألقانى

بين دخان الشيشه

وبين دخان الحلم الشايط

فرافيت

.....

خايف
وانا لسه بحاول أدوق فوران الحلم
يخربش عمرى
صباغ الروج
المتبحتر على خدك
خايف لما البنت اللي هناك قاعده
علي نص رصيف من قلبى
تبوحلك
تبقى ستاره ما بينا
.....

ممزوق
بين نن عنيك وبينها
ممزوق
ارقيني
م اللى نست جوايا روحها
ورحلت روحى
وشمت عيوني بطعم ريقها
وسلسلت بدنى

.....

الخوف بقى حد بيتحرك بيا
ياخد ايديا
لحد ما يدلقنى فيك
انتفض
اسكن فى روحك
تسكنى فيا
أشهى مدد
يا اهل القلوب
مولد وصاحبه اتوضى بالفوضى
وانا قلبى كان فضه
وعليه سبع أمارات
اطلق عيونى حب هان
وحب مش طايله

إديا تنزف حنين
وروحى تنزف قلق
انصب الحضره
درويش سنيى تقيد الذكرى فى الأحلام
والكل يشهق
ينتفض
وانا قلبى مرهون بالفراق

يوليو 2008

شفايف ملح

البنيت أم ضفيره سكات
بتقيد الشوق
أما انوى أعدي الشارع من غيرك
كان ضلى وضلك
ع الأسفلت الناعم
جنب رصيف عطشان
بيننا غشوا صباح الحب
الى يبل الريق
بالرغشه المدهونه خجل
وانا كنت بلم الحلم عشان محلمش لوحدى
وبقارن دايمًا بين الشمس وبينك
واتأكد إن الشمس عيوبك
تدخلنى

وتقييد الصبح في دمي

اطرحلك قمره

اكتبلك

نص الحلم

ونص الفجر

وكل مشاعري العريانه...

وكنتي

فرحة بينت يدوبك ترمي

عقد الفل

في حجرك وتسافر فيكي

دلوقتي هموم البحر المتلح

على حجر

خريف خرمان لعيونك

عريانه

ضلى وضلك على الاسفلت الناعم
باهتين
الشمس دموع هربانه
فى مطرة تطفى حروف الكون فى عيونك
وانا ضى لشوق
من دونك ملح ...
دموعك مسافات ...
خوفك بيساوى حروف
الكون العريان علي تنك
لو منك قلبى
خطى لشوقه
من غير ما يجرح حلمه
الخوف
المعجون بشفافى ملح

أكتوبر_2003

نص حلم

بنص حلم
تمسح الرصفان .. عنيك
تكتشف يومك الممزوق
يبتسم خوفك
على حيطان الوشوش
والقاهره
لسه بتكتب وردها
يسلسل الرصفان
ويخبى طعم الأمكنه
ويلخبط الأشواق
.....

لساها بريئة البنت
أم الشنطة دموع
تاخذك وتجيبيك
وايديك مضيهاش غير طعم
سلاسل زهقت
من قطع السكة م بين الاشواق
حتحاسب مين
ما هي عين الباب السحرية
اللى بتسرق أسرارك
وبتخدش أى براءه فى مشهد بكر

وقعت جواك
بتزك عنيك
على إيه
مش عارف إن كان شوق أو شط
تطلع كوبرى وتنزل مترو الأنفاق
وتدور
على طعم
مرسوم فى مراية قلبك بيضيع

.....

تتفجر زحمه
وتسيب إديا الشبعانه بالوحده
علي كرسى فاضي فى نفس التراييزه
فى نفس القهوه
ونفس الجرسون
بيجيب طلبين
ويزق سلامه
يجمع أصحاب ما اتقابلوش
غير جوايه
إنما شاهدين علي نص الحلم اللي بيجلدنى
نص الحلم اللي يدوبك بيحرض موتى
وبيعشق لبنان
رغم ان خريطة الوطن العربى
المرسوم جوايا
بتضيع

بناير_2009

الورقة الثانية

رباعيات وجع الحروف

وأهون عليك يا نين عين الروح
الغنوه جوه القلب طعم النوح
حتى النغم أصبح لغم ييحاكم المسافات
وانتى وانا ورقة بنفسج ولا شجرة نوح

واقف على سكة الخوف الغريق
أبني مداين فرحتك وانا حزني لسه برئ
يا هلترى فرحتك عارفاني م الأول
ولأحدود القلق فرشت ف قلبي طريق

يا عم ياللي الهوى عداك وفات أرضك
قولى منين الهوى يطرح دفاف حجرك
قال كنت ماشى ولكن خوفها وقفنى
قالى لفين يا قدر وانا هبقى ليك وحدك

إنت ابن مين يا جدع ؟ ابن الهوى والشط
أوليل عبيط استخبي فى الزقاق فوق خط
كتبت عليه الليالى أنزوى وحدى
لقيتني مسروق وسارق لما علقى شط

رفع الأدان الولى ينده الأحباب
بين ميت حجاب استخبي قلبى فى الجلباب
لقيتني باند..يا سيدنا الفجر هيشقشق
طلع الأدان للعشا والضلمه ع الأبواب

ويخونك الصيد يا حزين القلب والمرسى
وازاى تصيب الهدف..نبلتك خرسه
صياد ولكن لسه فيك إنسان
بيخاف على الروح حتى لو كلاب نجسه

دبحوك يا ليل قلنا لينا تار
لا ننام ولا يهنا لنا حلم فى دار
ضحكوا لنا قلنا غلابه لسه مش فهمين
إن النهار والشمس مش شطار

مجروح وجارح يالى عندك قلب
سألت عند الحكيم قال السبب فى الحب
دا العشق والشوق جرحهم ما يطيب
لقتنى قاعد برضه لسه بحب

أشواق ولكن فين سنين البوح
فين اللى كان حضاها الدمعتى مفتوح
قالوا السنين كفيه تطيب الأحزان
أنا قلت فانت سنين وبغريتى مدبوح

أنا كنت بافرد ضياك واطويه على قدى
واطلع على مركبك رحاله ومعدى
طب قولى شوقك بس يكفى لمين
وانت اللى طارح بين دفاك بردى

ورق النتايج طرح فوق الحيطان خوفا
من بكره لويصطفى قلبى يشوف شوفى
أنا شفت ياما ولكن صبرى علمنى
أعشق إيدى بكره لوينتشى بصيفى

مين يعصمك يا قلبى من شوقك
ريحة شياط مهجتك غطت على شروقك
دا انت اللى كنت ف زمان نن لضيا مهجته
أصبح ضياه للأسف بيحن لحروقك

الورقة الثالثة
شكل سادى لمراسم الفراغ

رقعة شطرنج الروح

واقف

بتعيد حساباتك مع نفسك

علشان الولد المحروم جواك

من إيد بتحن عليه

مع إن الآتى بيقلت منك

بتعذب روحك

إكمن البنت المتعبيه شقاوه

اللى رمتك آخر بصره عشان

تحتلك ضاعت منك

محلولة

ما تقول إن انتا ما كنتش منها

واللا انتا ما بتغيرش الوشين

اللى بتلبسهم دايمًا
يا بطل يا ضحية
جرب مره تواجه روحك
أصحابك ملاعين خاينين ١٩١
وانتا ؟

ما هو يا بنى الشئ بالشئ يذكر
اقعد ع الت
الشات إمبارح كان فيه تفاصيل
تجرح أى اتين عشاق
مع إن الشات تسمع وتشوف
إنما ما تدوقش
بس بيجرح

ريما مساحات الصوت

الى ما بينا بريئه

أقصد ..

بنمثل براءتها

إنما جوانا فضايح

أكبر من مليون شات .

مارس_2006

شكل سادي بيتكرر كل يوم

ف عز انفعالى
بلحظة موت بيتجدد
كانت الشمس بتلمس قلبى
وهى بتوشوشه
عن صحابى اللي كانوا بينسجوا
من وريدى
حكايات هايفه وبايخه
فمكانش عندى وقت
أو يمكن ودانى كانت زهقانه
من وشوشة البحر
فرميت الشمس بشكل عمودى ..
على الأسفلت
وكمليت انفعالى
.....

كان البحر لسه قاعد يلخبط ..
السماك ويعيد حساباته
مع محاره واحده عنيده
رافضه تطلع
على الرمله فى مظاهره ضد
سنانير الخداع
اللى بتسرق سمك البحر
كانت كل السنانير مرشوقه ف وش البحر
شكل سادى بيتكرر كل يوم
وكان البحر لازم يعترف
بكل اللى ف قلبه
وهو متأكد
إن لحظتها حيحكموا عليه بالموت

فمكانش قدامه حل
غير إنه يلخبط السمك
فى محاولة لخداع السنانير المرشوقه فى وشه
ومعلقاه فى بوصة بتنتهى بالنار
مع إن ف مقدرته
يثور
ويهاجم الجميع بالفرق

.....

كانت لحظة الموت لسه بتهاجم عنيه

وانا بطبيعتى حد عنيد

يمكن

عبد الرازق عواد

هو اللي زرع فيه فكرة المناهضة

من أيام زمان

لدرجة إنى كنت بناهضه

على سبيل التدريب والممارسه

وطبعاً مكنتش أعرف

إن أول واحد بيعلمك حاجه

لازم تتدرب فيه

المهم
فضلت لحظة الموت تهاجمنى
وانا أنا هضها
لحد ما انهزمتنا إحنا الاتنين بالخداع
ساعتها
مكنش قدامى
غير إنى اتعاطف معاها
ونهاجم كل السنانيير

ديسمبر 2005

صندوق الحواديث

كان صوتها المحفور في وداني
بيفور لحد ما يحتلني
وكان دائما يحرضني
أول ما احس بالحرمان
أجري على صندوق الحواديث
وادخل أول حدوده
أكل من شجرة التفاح
والبس حرير
واخذ الأميره على الفرس وأطير
وانام من الفرخ
شيء لذيذ
إن الواحد يدلق حرمانه

فى أول حدوته
وينام جواها
لا يحس بطل الخوف
ولا يسمح للمطره تدوق طعم هدومه
الهلكانه
وكبرت
لكن لسه الحواديت
أطفال
بس اللى قد يكبر
الحرمان والطل
وهدومى
وصحابى اللى يتعلموا
يستخبوا ورا حرمانهم

من غير ما حد منهم يحاول
يدخل صندوق الحواديث
أو حتى يجرب لذة
نومه ف كوخ صياد
كان دائما يصطاد حزنه
يدلق حلمه فنن البحر
ويكمل نومه
على صدر عروسة البحر
اللى بتفتح له كنوز
ياه
ألماظ وذهب وياقوت
كل ده ف الحلم
متعته
بتضيع مع أول خيط فى اليوم
اللى بيسحبنا
لموتنا

تلبسنا هدومنا
وتبدوق المطره طعم الجلد
المرجوف
من لهفة إيد
بتزن على قفايه
وصوت ييقول
شيل يابن الـ ...

أغسطس_2008

لحظه بتواجهه فى موتك

٣ حاجات

ممکن تفکر فیهم وانت بتستعد

للموت

وحتلاقيهم جنب بعض

زى التوائم

أول حاجه

إنك هترتاح

من الحاجات المقرره الرتيبه

اللى لازم تعملها كل يوم

وانت متعرفش قيمتها

تانى حاجه

إنك تفكر الأحلام

اللى إنت ما حققتهاش

وتحس لأول مره إنك ظلمتها
لما استحضرتها وفكرت فيها
واعتبرتها ملكك
وتقاوض نفسك
إنك تعدى من قدام
قسم الشرطه اللى بتكرهه .

وتوقف العسكرى انتباه
وهو ييأدى لك التحيه
عاشان تكون أول تحيه رسميه تتلقاها
كإن ده اعتراف
إنك هربان بالموت
وتالت حاجه
حتفتكر حببتك اللى خانتك
وباعت نفسها للمألوف
يا ترى حتكون ليك
فى الجنه ولا لأه

يوليو_2005

فراغ

فى ظروفك المشابهه لعلبة الكبريت
ممکن تقارن نفسك بالفراغ
فى كل مره بتشتعل مشاعرك
وكأنك أشبه بالغوايه
متستغربش
كل شئ حواليك بيحاول ينهشك
بعد اما يعلن اندهاشه
ده شئ طبيعى
زى عود كبريت
حد بيولع بيه سيجارته
وبيرميه

حتى السيجاره
مسيرها تتداس
زى كل شئ يبدأ بالاشتعال
بإمكانك تعيش ظروف مغايره
بشرط
إنك تلزق فى جزمة حد مسافر
وفى النهايه
حتقارن نفسك بالفراغ

أغسطس_2005

بعيد عن الأحلام

فعلا

الخوف شئ مش محتمل
صحيح أنا بقعد مع اصحابي
أحكيلهم عن مغامراتي
اللى بتتزف بطوله..
وازاي قدرت اخطى كل الحواجز..
واوصل لهدفى
حدوته برسمها كل يوم بخيالى
الغريبه
انى وانا بحكى
بخاف

بعدين أدبس قلبى
فى شئ تانى مش محتمل
يطرد الخوف من قلبى
ويراودنى ويحتلنى
يمكن الشئ ده
يكون (ضحكه معجونه ببراءة حبيبتى
اللى بتعتبر الحلم
شئ مهم لازم ندافع عنه)
ويمكن يكون
(فرحة حبيبتى وهى بتعدلى شوقها)
وربما
يكون من هتافاتهم
يا يموت .. يا يموت

المهم خايف من شئ مش محتمل
يقدر يطرد الخوف
اللى تعودت عليه
وبعتبره الشئ الوحيد الحقيقى
فى حياتى
اللى بيدينى أكبر فرصه فى الحياه
هى الحياه من غير خوف
يبقى لها طعم
على الأقل
بيخلينا متأكدين إننا لسه بنحب
بلاش كذب
وتعالوا نهتف
يا يعيش .. يا يعيش

تعالوا نعترف بالجبن
وعلى رأى المثل
عيش جبان تموت مقهور
غريبه إن القلم يغلط فى شئ مهم
أنا كان قصدى «مستور»
بس القلم كتبها كده
وكأنه عايز يحكم علينا بالضيق

الغريبه
إنى ساعات مبعذرش الناس
لما تفتح بقها
وهى بتدق عنيتها فى خلقتى
فى محاوله فاشله
لرشق ذكريات أحلامهم فى قلبى
ما علينا
الشئ المهم
إنى بقلق
ليفارقتى الخوف
واموت م الإنتظار

ديسمبر_2005

قرار

القرار
مش قرارك
وانت بتحاول تعدى الشارع
أمال ليه فالقنى
وعمال تكلمنى عن الشخص المستقل
اللى يقدر يحقق ذاته
ويكون محور أساسى فى أى نقاش محتدم
ومن هنا
كان ضرورى تعرف
إن كل واحد له دور
الراجل اللى سايق العربيه الهربانه

ليه دور
والخط المرسوم على الأرض
ليه دور
أهم دور
هو دور الراجل اللى واقف
على جنب ومحمر عينه
وده معناه إنه غضبان
وبالتالى كله يكلبش فى الأرض
فكرة المثير والاستجابة
أنا فاكر أيام الثانوى
كان نفسى أنجح وادخل كلية الحقوق
وده كان قرارى
وكان كل أهلى مقرررين إنى أنجح وادخل
كلية الطب

وكان قرارهم إنى أدخل علمى
وبعدين شعبة علوم
وكان القرار الوحيد اللي قدرت أحققه
إنى أسقط فى الامتحان
وفى يوم امتحان الكيمياء
كانت سكرتيرة مراقب الدور
اللى شعرها عسلى وعنيها عسلى
هدومها لون روب الحمام
وكان مكتبها جنب الشباك
اللى أنا قاعد جنبه من جوه
فكنت بيصلها وأنا حاسس
إنها جايه تدافع عنى
وعن أحلامى وقرارى

فكنا نكملوا الكلام الى مكنش فيه
وقت نقوله واحنا مع بعض لوحدينا
وكانت طيبه
قرارها الوحيد
إنها تمنح نفسها لأى حد أمين
فعلا صاحبة قرار

مايو_2006

مواسم

على الرغم من كل المواسم اللى عشتها
كان الشتا

هو الوحيد اللي ييفسل روحى
مع إنه ييطارد الشمس

ويحبسها جوه زنازين الغمام
فكنت أقيد روحى

عشان أكتشف مساحات

الضلمه اللى جواها

لحد ما كبرت واتجوزت

الغريبه إنى اتجوزت فى الشتا

وخلفت فى الشتا

وكانت "مى" موسم جديد
أقدر أترمى فى حضنه
واسيب كل المواسم
لصحابى اللى مبيعترفوش بحد
إلا إذا كان قدامهم
راسه بتهاجم السحاب
ورجليه بتشق الأرض
واما يغيب ينسوه
معندهم مش وقت يجربوا طعم السؤال
وآخر المواسم اللى جربتھا

"إلهام"

ودى بنتى الصغيره

الى بحس معاها لأول وهله

إن جيناتنا الوراثيه بقت مشوهه

بفعل الأوزون

والهام تتلخص فى ثلاث نقاط

طلباتها اللى ما بتنتهيش

وأسئلتها اللى ما بتخلصش

وغلاستها اللي مدوبياها فى العسل

ياه ... إلهام دى مشكله

لما تكون عمالها عمله

تيجى وهى فارد حضاها

تحتلك

وهى عارفه إنك هتفضب

لكن إيه اللي تقدر تعمله
وانت محتل ومحاصر بالقوانين العرفيه
شيئ مرعب ... مش كده
تقدر تعيش معاها
أربع مواسم كل ربع ساعه
يبدأ بالإلحاح ثم الغضب ثم البكا
ثم الضحك والفرح
ساعتها بعترف عن العالم قريه صغيره
وإن العولمه
تبدأ من إلهام
اللي دايمًا تفكرني إني متجوز
مع إني
بحاول انسى الموضوع ده
علشان أقدر أعيش حياتي

أغسطس_2006

احتلال

خلى بالك
فى اللحظة اللى انت
بتحذف عينك
على صدر بنت الجيران
أختك بتفتح الباب
لحد غريب
من الأكيد
إنه هيحتلها

أغسطس_2006

رغبة

يا ترى لسه بتتعذب بالفرح
بعد ما وقعت منى
وسبتنى أواجه اندهاشى
والملم روى
كل حته من نص
بتحاول تثبت
إننا مش ممكن نتقابل
فى صوت كبراج بيستهلك المواعيد
ويعتبرها شئ ساذج
يعنى إيه تقابل حبيبتك
تشرب معاها الشاي
وانت واقع جواها من أول ماسكة إيد

نفس الوقت ده ممكن تستهلكه فى مظاهره
أو حتى فى الترمای
أو على الكورنيش فى كمين
وانت بتوهم البحر إنك جاي تغسل همومك
وتقنعه إنك مناضل
وأکید نفسك تعدى الشط التانى
من غير ما تعرف إيه اللى مستنيك هناك

أغسطس_2007

اسکربت مشاعر

کراکب مشاعرك
عمرها ما تسد جوع
ورده وهى بتتقطف
فاقسم التفاحه بين وهمك
وبين ذکريات اکر مشت
واتلحت جواک
لسا الکریستال فاتحه للبحر بابها
وجانبها الشهدا
أسفلت ورصیف
یمكن یكون طریق للعاشقین
وممكن یكون طریق لموت تانى
یغریک بالحیاه
ویختصر عمرک
فی تراپیزه وشویه کراسی

فتجان شای أوقهوه
تسند عليه وانت بتخطيك لجوه
فتستبدل مشاعرك
برنة الموبایل
وتعلق راسك على كارتة الميمورى
وتفر القائمة
وانت صعبان علي نفسك
كل دول قابلتهم
وشاركتهم مشاعرك
واعتبرتهم ذاكرة حقيقية لانفعالاتك
وانت متعرفهمش
دلوقتى بقى
إيه اللي خلاك تواجه مصيرك
قدام ورده
تقدر
تحتلك من أول اعتراف.

أغسطس_2008

| | |
|----|---------------------------------------|
| 5 | الإهداء: |
| 7 | الورقة الأولى: حد مرهون بالفراق |
| 9 | بنفسجات الصبر |
| 15 | حبات الثلج |
| 18 | حلم الرصيف |
| 21 | ضفيرة من الكسوف والخوف |
| 24 | راكية الحواديت |
| 28 | سنابل الذكريات |
| 30 | ملكوت شياط |
| 34 | فرحة المولد |
| 37 | مواسم الانفلات |
| 40 | شلال غنا |
| 42 | دهشة |
| 44 | شرقة |
| 46 | حقيقة |
| 48 | جدران |
| 51 | حاول |

| | |
|-----|--|
| 53 | -حد مرهون بالفراق |
| 58 | -شفايف ملح |
| 61 | -لص حلم |
| 65 | • الورقة الثانية: رباعيات وجع الحروف..... |
| 71 | • الورقة الثالثة: شكل سادى طواسم الفراغ..... |
| 73 | -رقعة شطرنج الروح |
| 76 | -شكل سادى بيتكرر كل يوم |
| 81 | -صندوق الحواديت |
| 85 | -لحظه بتواجهه فى موتك |
| 88 | -فراغ |
| 90 | -بعيد عن الاحلام |
| 95 | -قرار |
| 99 | -مواسم |
| 103 | -احتلال |
| 104 | -رغبة |
| 106 | -اسكربت مشاعر |

شركة الأمل للطباعة والنشر

(مورافيتلى سابقاً)

ت، 23904096 - 23952496

وقع الكلام
والشمس قامت تسخبي م المطر
طب مين حيدظني
ومين يدظني
طل الدفا
من مستطيل البرد والغربه
اكتب مواويلك على الصفصاف
وان خاف يشاركك ازمنك
ارحل.

الغلاف .. أحمد شوقي

Bibliotheca Alexandrina
مكتبة الإسكندرية



1237497



نجلبات
أدبية

www.gocp.gov.eg

www.qatrelnada.com.eg

www.althaqafahalgadidah.com.eg

www.odabaaelaqaleem.com

التمن : جنيهان